



Sr. J.E. Abraham  
Lider polítiko di P.D.B.  
Kralendijk  
Boneiru.

Kralendijk, 03-09-2004

Distinguido Sr. Abraham i Partido Demokrat.

Dentro di un siman pueblo mester bai skohe pa un direkshon sumamente importante pa nos futuro. Nos a pasa 3 luna di diskushon ku tabata 3 tres luna di **divishon**. Despues di a skucha ku hopi atenshon diskursonan di tantu Sr. Jaime Saleh komo Sra. Suzy Camelia-Römer pa loke ta trata nos futuro struktura estatal, nos a haña inspirashon pa manda e karta akí pa abo i bo partido.

Despues di a skucha loke profeshonalnan imparial a trese dilanti den nan diskurso ayera nochi, nos ta kere ku e dos partidonan ku pueblo a pone su konfiansa den nan - dunando nan representashon den Konseho Insular-, pa tòg nos hasi un último esfuerso pa nos bin huntu i pa dirigí pueblo den un direkshon. E diferenshanan di pensamentu entre UPB i DP ta diferenshanan ku nos por yega na akuerdonan pa den un forma, nos para riba un liña pa nos isla. Nos a hasi esaki kaba na momentu ku nos a bai Hulanda huntu, pa atendé e asuntu di relashon un-riba-un.

Despues di a tende tantu Sr. Jaime Saleh komo Sra. Suzy Camelia-Römer, nos ta komprondé ku e struktura di Antia lo dispersé. Antia no ta posibel mas. Maske kuantu gana nos por tin, realidat ta pone ku nos no por ta den un Antia mas. Ya kaba gobièrnu di Reino i Hulanda pero tambe tur isla di Antia, a pone kaba ku Antia ta un stashon pasá. No tin boluntat polítiko pa mantené, ni rekonstruí e Antia aktual. Sabiendo esaki Minister Tom de Graaf a instituí un grupo di trabou pa sondia e posibilidat di kada isla pa por haña un laso direkto ku Hulanda.

Nos no ke bai diskuf e posishon pa loke ta trata bira un pais independiente pasobra segun nos esaki no ta un opshon realístiko. Opshon B i C ta opshonnan ku dependiendo di kua kontenido ser duná na nan, ta e opshonnan mas realístiko. Realísitikamente nos ke a pidi partido Demokrat pa kompañá nos den opshon B, poniendo e lokualnan ku partido Demokrat ta

haña realístikamente komo kondishonnan pa mañan nos konhuntamente, negoshá esakinan pa un laso direkto ku Hulanda.

Opshonnan B i C ta laso direkto ku Hulanda i si DP tin problema ku por ehèmpel autonomia, laga nos firma un karta huntu òf ban Konseho Insular promé ku dia di referèndem pa aprobá esaki den un moshon. Den e moshon nos ta akordá ku nos ta atendé huntu e negosashonnan di B, bou di kondishon ku autonomia ta un parti sumamente importante. Nos lo akordá pa mantené máximo autonomia manera nos tur dos partido ta para p'é.

E diskushon enkuanto introdukshon di kasamentu di homoseksual, eutanasia, leinan immoral, bendementu di droga legal, legalisashon di aborto èts., tambe por ta parti di e moshon pa nos konhuntamente desaprobá esakinan, pasobra nos tambe ta pará 100% kònta di esakinan. Nos partido ku ta un partido kristian, **hamas** lo por aseptá e tipo di leinan aki ku ta bai en kontra di nos prinsipionan i kultura.

Tambe nos por hinka e diskushon di bira munisipio òf provinsia den e moshon pasobra serka nos no ta biba e pensamentu pa Boneiru bira provinsia ni munisipio. Si tin mas kos realístiko ku Partido Demokrat ke pone den e moshon, nos ta dispuesto pa diskutí esakinan pa despues pone nan den e moshon i sali na defensa di nos pueblo.

Nos ta hasi un yamada urgente na partido Demokrat riba e dia di awe, 3 dia promé ku dia di Boneiru, 1 siman promé ku e fecha di referèndem, pa partido Demokrat reflehá i habri kurason pa diskutí algu ku ta mihó pa Boneiru i laga nos no bai sigui den e sistema di antagonismo akí. Nos a tende ekspertonan bisa ku den B tur posibilidat por i ku nos por kondishon'é. Pues konhuntamente nos por buska e solushon ku ta mihó pa Boneiru.

Sperando riba bo reakshon, mi ta keda,

Atentamente,



Ramonsito Booi  
Lider polítiko di Union Patriótiko Boneriano